



Boletin informativo Flamingo



Flamingo –

Phoenicopterus ruber

Kasi sigur bo konosé nan, e paranan ros pipa masha bunita ku hopi biaha bo ta mira kana den e awa di e benewater i saliñanan. Si bo bai Jan Kok, por ehèmpel, hopi biaha bo por mira gruponan di e paranan aki. Nan ta kana riba pia masha largu i finí, tin un pik pretu doblá i asina bo yega un tiki muchu serka di nan, nan ta kana poko poko alehá for di bo. Flamingo ta un para masha popular, no solamente na nos isla sino sigur tambe na nos isla bisiña Boneiru kaminda tin masha hopi mas di e para akí. Einan e bestia ta asina popular ku asta e aeropuerto di Boneiru tin su nòmber: Aeropuerto Flamingo. E nòmber original pa flamingo na nos islanan ta Chogogo.

Rònt mundu tin diferente tipo di flamingo, pero e flamingo ku tin na nos islanan ta e Flamingo Grandi òf karibense ku e nòmber sientífiko *Phoenicopterus ruber*.



Mas informashon di e departamentu di ENM
(Edukashon di Naturalesa i Medioambiente) di
Carmabi riba:

Wèpsait: www.carmabi-educatie.org

Facebook: [carmabi NME education](https://www.facebook.com/carmabi-NME-education)

Instagram: [carmabi nme](https://www.instagram.com/carmabi_nme)





Boletin informativo Flamingo

Para

Flamingo ta un para. Manera kasi tur para, un flamingo por bula. I esei nan por hopi bon, pasó den un anochi e flamingo por bula masha leu. Algun flamingo ku ta biba riba nos islanan ta kambia di isla basta biaha. Esun dia nan ta na Boneiru, e otro dia na Kòrsou i un otro dia na Venezuela. Ademas, meskos ku otro para, flamingo tambe ta pone webu pa prokreá.



Físiko

Flamingo tin un largura di 140 pa 175 sèntimeter. Den esaki a konta e kabes i e garganta aserka, ku huntu tin un largura di mas o menos 63 pa 86 sèntimeter. Manera serka hopi otro bestia, e flamingo machu ta mas grandi ku e muhé. E bestia no tin solamente un garganta largu pero tambe dos pata oraño-ros masha largu mes. Entre e tenchinan tin zwemvin. Na su kabes tin su pik típiko un tiki den forma di un bakoba. E dos wowonan ta chikí i ta un koló hel kla. Aki riba tin un imágen skemátiko di e kurpa di un flamingo.

Bo tabata sa ku...

Pa muchanan sabí ku ke sa ainda mas

Riba nos wèpsait tin hopi mas informashon, video i plachi pa klùr.

Òf mas leuk ainda: bishitá nos Marine Education Center na Carmabi Piscadera!



Boletin informativo Flamingo

Kustumbènan i kustumber alimentisio

Flamingo ta biba den saliña (lagun salu, plat, grandi) òf lago. Nan ta bestia mashá sosial. Esei ke men ku kasi nunca (komo preferensia) lo bo mira un so só, sino semper ku otronan den gruponan grandi. Semper nan ta buska kompañó di otro. Ta masha prèt pa mira un flamingo buska kuminda. Pasó e tin diferente manera pa hasi esaki. Asina e por ta kana pa buska su alimento. Òf bo ta mira nan ta kana kabes bou di awa den e saliñanan òf nan ta kue awa ku nan pik na superfisie di e awa. Ademas, tin biaha bo por mira nan ta landa buska kuminda i nan sa asta hasi esei kabes abou. E pik di e bestia ta un instrumento masha ingenioso. E pik mes huntu ku e lenga di e bestia ta forma un sorto di sistema di filter. Ora e bestia ta buska kuminda, e ta chupa awa tene den su boka i e sistema di filter ta filtra pidanan di kuminda saka for di e awa. E pidanan di kuminda akí ta konsistí entre otro di kreft chikí di saliña, kokolishi, larva di sangura di saliña i otro bestia i mata chikí. Flamingo tambe mester di awa pa bebe meskos ku nos.



Bo tabata sa ku...?

Kasi sigur bo a puntra bo mes hopi biaha kon bin flamingo tin i ta keda ku un koló asina bunita ros. E bestia ta haña e koló ros ei for di su kuminda. Pasó e gusta kome kreft chikí di saliña i e kreft mes tambe tin un koló ros. Flamingo ta kome asina tantu di e kreft akí, ku e koló ta bin paresé den su plumanan.

Pues, abo si, no kome muchu kreft... 😊


Komo awa pa bebe nan ta usa awa di laman. Durante awaseru nan por fangu awa den nan plumanan tambe i bebe esaki. Ademas, urina di para ta un sorto di pasta blanku. Kasi no tin awa aserka, manera ora nos pishi den tualèt. Asina nan por saka e salu (di e awa di laman i di nan alimento) i otro residuo for di nan sistema sin pèrdè muchu awa. I naturalmente esei ta hopi práktiko.



Boletin informativo Flamingo

Prokreashon

Flamingo ta traha nèshi komo parti di kolonia. Esei kemen ku nan ta traha nèshi huntu komo grupo i ta pone webu i alimentá nan yunan mas o ménos pareu. Nan ta traha nèshi di lodo. E nèshinan tin forma di un kegel ku un tòp plat i por ta kasi 40 sèntimeter haltu. Komo nan ta traha nèshi den un kolonia, den e temporada di brui (e periodo ku nan ta pone webu, pone webu brui i kria nan yunan) tin masha hopi nèshi huntu, un berdadero siudat di flamingo. Nan ta traha nan nèshi den awa pa asina e mayornan por kana bai na e nèshi pa pone e webunan brui òf pa duna yu kuminda sin problema. Flamingo por pone webu durante henter aña. No ta konosí eksaktamente kua ta e periodo spesífiko pa flamingo brui. Loke si sientífikonan a haña sa ta ku probablemente esaki tin konekshon ku temporadanan di áwaseru. Generalmente, flamingo ta traha nèshi ora tabatin bon áwaseru. Un flamingo ta seksualmente madurá na edat di 5 pa 6 aña. For di e momentu ei nan ta adulto i kla pa prokreá.



Ta te ora un flamingo muhé i un flamingo machu a sedusí otro numa nan ta hasi esei. I nan ta sedusí otro ku un sorto di baile di amor kaminda nan ta zuai ku nan kabes, marcha den e awa i bati nan alanan. Si e machu i e muhé haña otro, nan ta bai forma pareha. I despues di esaki e muhé ta pone su webu(nan). Den kada nèshi mayoria bes tin 1 webu. Den kasonan eksepsional nan sa pone 2 webu. Despues ku a pone webu, tantu e machu komo e muhé ta pone e webunan brui. Bùrt pa bùrt nan ta sinta riba e webu.





Boletin informativo Flamingo

Despues di 28 pa 30 dia por fin e momentu a yega i e yunan ta sali for di e webunan. Nan ta mashá chikí e orei ainda i ainda nan ta leu for di tin e bunita koló ros di nan mayornan. Ora e flamingonan ta chikí, nan ta shinishi i parse katuna. Una bes e yunan sali for di e webu completamente, nan mes mayornan ta sòru pa nan i ta duna nan kuminda. Ora nan ta un tiki mas bieu, ta pone tur e yunan serka otro den un sorto di krèsh. E orei no ta nan mes mayornan ta keda kuida nan mas, sino un par di flamingo adulto ku ta keda wak e yunan mientras ku e otro flamingonan adulto ta bai buska alimento. Sí ta asina ku den e krèsh e yunan ta keda alimentá dor di nan mes mayornan ku ta bin bèk kada bes spesial pa esei. E flamingonan ku ta wak e yunan no ta duna nan kuminda, ni protehá nan. Den e temporada di brui, flamingonan di Boneiru ta bula pa Venezuela tur dia pa buska kuminda pa nan yunan. Na Boneiru e kuminda no ta sufisiente pa tur e bestianan ei.

Habitat

E tipo di flamingo ku nos konosé ta paresé den henter e area di Karibe. Na Kòrsou nos ta mira gruponan di flamingo na diferente sitio. Mayoria bes nan ta den e saliñanan di Jan Thiel, St. Michiel i Jan Kok. De bes en kuando den un laman chikí por tin un ku lo por a pèrdè kaminda. Bo sa mira nan tambe tin biaha den algun saliña ora esakinan ta yen di awa, manera por ehèmpel e saliña di Daaibooi. No solamente komo aki nan ta haña gran parti di nan kuminda sino tambe komo ta trankil sufisiente pa nan brui. Na Klein Bonaire tambe sa mira nan hopi. E kantidat di flamingo a subi enormemente den e último 20 añanan den e area di Karibe i tambe na Kòrsou. Kada aña ta traha mas nèshi.

Flamingo no tin mashá enemigu natural, aparte di hende... kachó ku ta kana lòs, polushon, strobamentu di areanan kaminda tin nèshi, etsétera.

Bo ke sa mas di Flamingo?

Purba sigui buska e informashon aki bou riba internet.

- Flamingo ta un para i huntu ku mamífero, piská, rèptil i anfibio ta pertenesé na vertebrado (animal ku tin un kolumna vertebral).
- Para ta animal di sanger kayente, meskos ku mamífero. Esaki ta nifiká ku semper nan tin e mesun temperatura di kurpa (di hende ta aproksimadamente 37,5 °C).
- Flamingo ta omnívoro (komedó di tur kos), pasó nan ta kome kangreu chikí i mata chikí / lima. Kiko ta un herbívoro i kiko ta un karnívoro?

Gosa hopi ora di buska i lesa mas informashon.

